



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

ig tiryimym@aolima

yt tir yimym

TAPAK 8

**Tir Wickremesinghe-i Sri Lanka tir election nung tokteptsü**

**Olympics: Manu Bhaker-i India atema mezüngbuba medal nguogo**



VOL. XXI ISSUE NO. 286 (ADOK 286)

DIMAPUR

TENTONÜ (MONDAY)

CHITENI (JULY) 29, 2024

₹ 5.00

## Police-i tanur merenshiba aitsür: MTLT

**Dimapur, July 28, 2024 (TYO):** Mokokchung jila nung July 25 aser 26 anogotem police anati tanur tetsür ka merenshiba aser iba sülen lar tsüraburtem amokmerenba aitsür ta Mokokchung Town Lanur Telongjem (MTLT)-i metetdaksüogo.

"Loktiliba nung ozüng amertemi yi jemer arishi küm 6 tanur ka teyi den tuition nungi arudang lendang merenshiba aitsür. Onoki lar ki semdangdang tanutsüla kanga tetsübu tia ka nung aliba nguogo aser iba ajanga la taküm piyong timtemtsü" ta MTLT-i ashi.

Ano kanga dang taoksatsü kaji police ana jagi tanutsülar kidangi or lar tsüraburtem merenshiba lir.

Tenati kechi tebilemba nung iba mapa inyak'ar memetet saka tena metentsü kuli kecha mali aser tenati inyakba khukhua aitsür ta President Imnaone Pongen aser Asst. General Secretary Moarenba Ozukum nati sangdong ka nung ashi.

MTLT-i tanutsüla tajungba akümtsü moatsür aser Mokokchung jila nung lanurtemi lai temeten bushiba nung pusema nungittsü nangzüker ta tenatisa ashi.

MTLT-i iba ken o nung tenük yoktsü aser ozüng alema inyakertem dang nungi Mokokchung jila kümzüka ayutsü atema teinyaktsütem inyaktsü ta MTLT mendenpurtemisa ashi.

## DNSU-i kaketshirtem atema sodi meshiloktsür

**Dimapur, July 28, 2024 (Agencies):** Dimapur aser temeket nung anü kanga tatsük apoba atema Dimapur Naga Students' Union (DNSU)-i state aser sorkar aser shisaliok rejutem dang summer holidays atsülangtsü ayongzükogo.

Tawa kanga tatsük akümba ajanga kaketshirtem aser tesayurtem temang nung timtem adoktsü akok. Iba ama tatsük mapang classroom nung mementetsü aser tesayur o kaketshir temang nung timtem adoktsü" ta DNSU-i ashi.

Asenoki meimlai aliba mapang

ajurur asünung shisaliok rejutemi kaketshirtem mechi nung anogo ishika sodi atsülangtsüla ta DNSU-isa ashi.

Dimapur aser temeket nung heatwave ya lira Independence Day parades nung kaketshirtem medendaktsütsü mepishir ta parnoki ashi.

DNSU-isa tsüngsang-mopung melenshiba anema süngdong atemtsü aser mopung tajung angutsü nenshia metetdaksüogo.

Parnokisa nübortem dang tzü peria ajemtsü aser kima nung kangabo mesenzütsü shiogo.

## Delhi nung kaketshir 3 araksetba sülen coaching centres 3 shibangtsüogo

**New Delhi, July 28, 2024 (Agencies):** New Delhi nung civil services aspirants asem tzü nung araksetba sülen Deobarnü Municipal Corporation of Delhi (MCD)-i ozüng alema ki toko nung lapokba coaching centres asem shibangtsüogo.

Iba tatalokba atema kaketshirtemi temeten meshir aser tanü MCD Additional Commissioner Tariq Thomas-i parnok den jembidang "ki toko nung lapoka aliba coaching centres 8 jangjaogo aser onoki asem shibangtsüogo" ta ashi.

New Delhi nung kaketshirtemi civil services aspirants asem asütsüsa tia ajuruba atema aibelenertem merenshitsu aser tasür kibongtem nem teyari agüjang ta takhangba agüja lungkak ait.

"Sorkari teyari agütsütsü. Iba tatalokba atema mapa inyaktsü. Onoki survey ka agidar aser sorkari magisterial inquiry tetuyuba agütsütsü" ta Tariq

Thomas-i lungkak aitba kaketshirtem dang ashi.

Honibar aonung tzünglu kanga aruba mapang Rau's IAS Study Circle toko metsüngbang aser idangji tetsür ana dena kaketshir asem arakseta liasü.

"Iba institute kiburi ki toko nung kaketnang alidak safety measures shitak meinyakba ajiteter. Pai iba ya ozüng alema lapokba liasü aser entry aser exit point ka dang liasü. Iba kishiji biometric-enabled liasü aser tzümetsüng ajanga lock süadok" ta MCD ketdangtsür kati ashi.

"Kishiji shitak dang ali asübo kaketshir ajak kümzükla. MCD-i building plan dang mulunga agizüker saka nisung kari ki tokoji parking aser storing atema dang amshitsu ta ser tim mesüi amshi" ta ketdangtsürisa ashi.

Tanü Mayor Shelly Oberoi-i MCD Commissioner Ashwani Kumar dang ki toko nung commercial activities inyakertem merenshitsu tetuyuba agütsüogo.

## BJP CM temi central welfare schemes nung teka maitsüla: PM Modi



BJP headquarters, New Delhi nung Prime Minister Narendra Modi den Union Home Minister Amit Shah aser BJP National President JP Nadda nungeri NDA-i sorkar yimsü asüba state tem nungi chief minister tem den senden amenba angur.

**New Delhi July 28, 2024 (Agencies):** Prime Minister Narendra Modi-i BJP sorkar aliba state nung chief minister tem dang central government schemes mapa küma inyaktsü tetuyuba agütsüogo.

State sorkartemi central government schemes nung temelenshi kecha mesüi inyaktsüla ta PM Modi-i ashi.

Anogo ananü BJP Chief Ministers's Council meeting Deobarnü tembang aser iba

senden nung PM Modi, Union Home Minister Amit Shah aser Defence Minister Rajnath Singh nunger aden.

Centre sorkari sensakertem atema welfare schemes inyakba nung temelenshi kecha malitsüla ta Prime Minister-i chief minister tem dang ashi.

Tashishitsu agi Centre sorkari Pradhan Mantri Anna Yojana kübok kibong ka nung nisung shia nem jangotsü seret 5 agütsür anungji state sorkari iba dang

nungi teimba mesüra ajemer magütsütsüla.

PM Modi-isa chief minister tem dang beneficiary schemes shitak inyaktsü atema temulung agütsütsü nenshia metetdaksü.

Honibarnü BJP chief minister temi pei pei sorkartemi inyaktsüta osang lemsatepa liasü.

Uttar Pradesh aser Assam dena state pungu nungi chief minister temi PM Modi tsüngda presentation agütsü ta osang angazüker.

## CRPF-i Manipur nung mapa tuluba inyaktsü: Home Secretary

**New Delhi, July 28, 2024 (Agencies):** Manipur nung Central Reserve Police Force (CRPF)-i law and order tiptema ayuba nung tongtipang shilem agir ta Union Home Secretary Ajay Kumar Bhalla-i ashi.

CRPF 86th Raising Day benjungmong nung jembidang Bhalla-i ozüng alema

inyaksangshi azüokba aser pei talidak toktsür aortem jenoktsü kiojen agütsüba atema tenüngsang agütsü.

"Manipur nung CRPF mapa tuluba inyaker. Parnoki Manipur nung ozüng alema inyaksangshiba azüokogo aser shelter homes agütsür" ta Bhalla-i ashi.

May 3, 2023 nungi Manipur

nung Kuki-Zo aser Meitei nunger tsüngda rara adokba ajanga tensa mesüngjemteti arur. Iba rara nung nisung 221 süogo aser nisung 60,000 tema pei talidak toktsür aotsüsa kümogo.

Tensa azüoktsü atema Centre-i Manipur nung Indian Army aser Central Armed Police Forces (CAPF) personnel 36,000 shi mapa lemezükja liasü.

## Northeast state 3 nung Governor tasen shimer

**Guwahati, July 28, 2024 (Agencies):** President Draupadi Murmu-i Honibar aonung state 9 atema Governor tasentem shimogo aser iba nung Northeast nungia state asem dena lir.

Chhattisgarh Governor inyaktsü atema Assam nungi taoba Lok Sabha MP Ramen Deka aser Telangana Governor atema Tripura nung taoba Deputy CM Jishnu Dev Varma na shim.

Arishi küm 70 tain Deka-i 2009 nungi 2014 aser 2014 nungi 2019 tashi kümsük ana Lok Sabha MP inyakogo. 2019 Lok Sabha Election nung BJP-i pa nem party ticket magütsü.

Tripura nung Biplab Deb-i 2018 nungi 2023 tashi aniba cabinet nung Dev Varma-i Deputy Chief Minister inyaka liasü.

"India President aser Prime Minister na dang Telangana Governor ka ama ni nübortem tenzüksü maongka agütsüba atema pelaba metetdaksür" ta Varma-i ashi.

"Iba ya ozü state Tripura agizükba ama züngshir kechiyong Independence sülen Tripura nungi Governor inyaktsü shimbaji ni mezüngbuba lir. Anungji ni Tripura tenüng nung maneni nüna dang pelaba metetdaksür" ta Varma-isa ashi.

Maneni, Sikkim Governor Lakshman Prasad Acharya-i Assam Governor inyaktsü shim aser pa nem Manipur Governor repsema inyaka atatsü lemezüktsüogo.

Assam Governor Gulab Chand Katariahas-i Punjab

Governor aser Union Territory of Chandigarh Administrator inyaktsü.

Rajasthan nungi BJP lenir tejen aser taoba Rajya Sabha MP O P Mathur-i Sikkim Governor inyaktsü shim. Maneni, Karnataka nungi taoba Lok Sabha MP C H Vijayshankar-i Meghalaya Governor inyaktsü.

BJP lenir tejen Santosh Gangwar-i Jharkhand Governor inyaktsü aser taoba Maharashtra Assembly Speaker aser BJP lenir Haribhau Kisanrao Bagde-i Rajasthan Governor inyaktsü.

Puducherry nung Lt Governor inyaktsü atemar Retired IAS officer K Kailashnathan shim aser Jharkhand Governor C P Radhakrishnan-i Maharashtra Governor inyaktsü.

# Matamabensai aliba kinungertem asoshi workshop ayongzük



**Dimapur, Chiteni/July 28 (TYO):** Matamabensai aliba kinungertem asoshi workshop ka Office of the State Commissioner for Persons with Disabilities ajanga 'Navigating the Journey Together' omen kübok July 26, 2024 nü Tourist Lodge, Dimapur nung ayongzüka agia liasü. Pei ajangshibatem

lemsatepa aser ajungshitepa yariteper tali adokdaksütsü nukjidong nung iba sentong ya ayongzüka liasü, kong State Commissioner, Diethono Nakhro-i sentong ayongzükba nukjidong rateta ashi. Iba workshop nung shisalen sayur Daniel Thong Seb aser Chubarenla Longchari nungeri 'Parenting a Child with

Disability' indang onük nung ajemdaker jembi aser Clinical Psychologist, Imlibenla Mongro-i 'Navigating through Emotions and Stress' onük nungi jembia liasü. Iba sentong nung NAPAD nungi Bendangla Kikon aser Inatoli V. Zhimo nungeria pei tajangshibatem lemsatepa liasü.

# August 2 nü ANCSU Foundation Day amungtsü

**Dimapur, Chiteni/July 28 (TYO):** All Nagaland College Students' Union (ANCSU) tenzüker aser tesüiba lenirtemi bendanga agütsür inyakba tushia aser takok anguba benjonga 45 buba Foundation Day cum Degree Toppers Felicitation sentong August 2, 2024 nü Capital Convention Centre, Nagaland Civil Secretariat Road, Kohima nung agitsü, ta ANCSU

sangdong ka ajanga ashi. Kasa sentong nung ajanga tawa sangdongba degree toppers nem ANCSU ajanga tenüngsang agütsüba alitsü. Iba sentong akhumdong Dr. A Nshoga, Director, Higher Education, Government of Nagaland alitsü. Temaba jenjang nung takok angurtem moaja sarasadem balaka alitsü aser ANCSU senior aser NSF nungi

tajungshi o jembitsü. Anungji degree toppers aser ANCSU indang seniors tem iba sentong nung arua adentsü ayongzük, ta ANCSU sangdong ajanga ashi. Maneni iba sentong nung ANCSU indang affiliated aser associate units temi college shia nungi kaketshir ana-na yoktsü ayongzük, ta sangdong ajangasa ashi.

# Guwahati University Vice Chancellor inyaksü Nani Gopal Mahanta shimogo

**Guwahati, Chiteni/July 28 (Agencies):** Guwahati University indang Vice Chancellor inyaksü atema nüburtemi kanga junga meteta aliba tashi temeteter Dr. Nani Gopal Mahanta shimogo. Mahanta ya nüburtemi kanga jangja meteta aliba political scientist ka lir, aser pa Assam sorkar indang academic advisor ka ama 2021 nungi 2024 küm February ita tashi inyaka liasü. Pa sorkar metenzükang Guwahati University nung Political Science department nung professor inyaka liasü. Mahanta ya Jawaharlal Nehru University, New Delhi nungi Political Science nung



MA renem aser Guwahati University nungi PhD renema liasü. Pa University of California, Berkeley nunga Rotary World Peace Fellow ama Peace, Conflict Resolution, and Policy Studies küm ana course zünga

liasü. Mahanta-i kaket tajung aika zülua lir aser item rongnung "Confronting the State: ULFA's quest for Sovereignty" aser "Citizenship Debate over NRC and CAA" dena lir.



Süngdong-lidongji tongtipang aser jenjang tulutiba sempet libajen wazüka ayutsü nungdaker ta angatetdaksütsü nukjidong nung Assam Rifles temi July 28, 2024 nü süngdong atemba sentong ayongzüka liasü. Hopta piyong süngdong atemba maparen inyaka aruba nung shilem ka ama aser Assam Rifles temi region nung takumsangnu lirumedema lidaksütsü asoshi yimya balala amshiba den lirumedema iba sentong ya ayongzüka liasü. Iba anogo tesem balala nung süngdong 550 shi atem.

# Nagaland CM-i Alienba Jamir asükhu lemsatep

**Dimapur, Chiteni/July 28 (TYO):** 21 Tuli Assembly Constituency nungi MLA, A. Pangjung Jamir tebu Alienba Jamir, July 28, 2024 nü asüba osang angazüka jashir, ta Nagaland Chief Minister Neiphiu Rio-i sangdong ka ajanga ashi. Asür Alienba ya Tsüngrem metetba nisung ka liasü, shibai dangar dang teti aria bilem aser mapa meranga inyaka liasü. Pai sorkar tenzüka mapang ochishia aser bendanga agütsür

tenzüker aser nungdabapur mulungsoa yaria liasü, ta Nagaland CM ajanga ashi. Nenok mangyimba mapang pai mapa tajung inyakba bilemteta nenok temulung nung anisingzük angutsü sarasademtsür. Ozü kibongi mangyimer den asükhu lemsateper aser Tulusang Tsüngremi nenok mulungjang nung anisingzük agüjangma. Asür tanüla teti tatem maka tesunep nung anisingzükjang ta sarasademtsür, ta CM Rio ajangasa ashi.

# Dimapur nung mejangjaba nisung tasü mang ka nguteta lir

**Dimapur, Chiteni/July 28 (TYO):** Dimapur Police ajanga sangdong ka nung ashiba agi, July 27, 2024 anepdang 4:00 ako meta Sub-Urban Police Station, Dimapur nungi duty officer-i telephone ajanga Marwaripatti/Station Road area, Dimapur nung mejangjaba tetsür tasü mang ka lir ta osang arua liasü. Iba osang angazük duty nung alirtem tasü mang aliba tesemi ao aser arishi küm 40-45 tsüngta tetsür tasü mang ka nguteta liasü. Tenük kuli lia parnoki iba tasü mang ya bushisingdang aser la ya talidak ki makar aser meshitsüyar ka liasü ta

osang balala ajanga angazük. Yangji ozüng agi melaba maparen ajak tembanger PM examination/identification atema tasü mang ya District Hospital Dimapur Morgue nung yua lir, ta sangdong ajanga ashi. Iba nisung ya tula sentüsü puipuir aser temesung ajenloker, muffler sentüsü temesung nung tanen temtangpusa aser long pant sentüsü balala aliba semer liasü. Kibur/kinunger/tembar temi Officer-in-Charge, Women Police Station, Dimapur den Mobile No. 7085055027 ajanga tongteprateptsü akok, ta sangdong ajangasa ashi.

# NITI ajanga medical & engineering zünger nem orientation agütsütsü

**Dimapur, Chiteni/July 28 (TYO):** Nagaland nung Science azünger mesüra medical aser engineering zünger kaketshir 10,000 shi lir, aser ano Assam aser Manipur arütsülen alirtem züngoksemra timba akumtsü. Nagaland nungi IIT aser AIIMS doctor azünger ishika lir aser ano tali ang nungdaker. Anungji iba tawa süngdaksütsü meranga NITI (Nationalist Institute of Technology & Innovation) ajanga Marwari Patti Dimapur Center nung August 1, 2024 nü medical aser engineering career atema angati orientation sentong ka ayongzüktsü, ta Ajay Sethi, MD, NITI Nagaland ajanga sangdong ka nung ashi. Iba sentong nung NITI nungi takotet tesayur Dr. Abdul Hafeez, Prof. Dr. Ajay Sharma (IIT Guwahati) aser Ashwani Choubey (IIT Bombay) arua sentong agitsü aser Er. Rishav Sethi, DTU, Delhi aser Divya Sethi, Audiologist, AIISH,

Mysore nungeri online session agitsü. Iba den guest IITian faculties Saurab Jain, Jitesh Sethi nungeria shilem agitsü. Anungji Science aliba school aser college ketdangsur temi pei kaketshir anir arua NITI indang NEET-JEE Dimapur Center, Marwari Patti near Jain Girls College, Dimapur nung iba sentong nung adentsü ayongzük, ta sangdong ajanga ashi. Sentong ya August 1, 2024 anepdang 11:00 ako nungi ka aser nikongdang 3:00 ako nungi ka alitsü. Maneni NEET & JEE repeaters tema pei kinunger dener arua iba sentong nung shilem agitetsü. Mezüng applicant 50 nem coaching classes atema 50% Freedom scholarships agütsütsü. Iba sentong nung IITians, NITians, NEETians den nübur lenirtem, doctor aser engineer tema arua adentsü ayongzük, ta sangdong ajangasa ashi.

# Govt. Polytechnic Peren nung design course admission tenzüker

**Dimapur, Chiteni/July 28 (TYO):** Interior design nung küm ka certification atema Government Polytechnic Peren nung July 29, 2024 nü admission tenzüksü aser August 12, 2024 tashi alitsü, ta sangdong ka ajanga ashi. Iba programme nungya Residential design, Commercial design, software design, project management aser client interaction amala course tem agütsütsü. Government Polytechnic Peren ya Directorate of Technical Education kübok aser State Council for Technical

Education Nagaland-i approve süa lir. Iba reju ya 2021 küm amenok aser technical education tsütsü diploma programme balala agütsür. Yangi tesayurtem ya takotet nisungtem lir aser facility tasen aliba ajanga kaketshir temi tanü tendak takok angutsüsa angazük. Osang tali tejangjaba metetner temi mobile number 6003082358/ 8014811621 nung jembitetsü mesüra http://gppnagaland.co.in nung email sütetsü, ta sangdong ajanga ashi.



Navi Mumbai nung arrshi küm 30, Akshata Mhatre tashiyim amshia raksatsür tepsetba anema Amongnü Navi Mumbai nung tetsürtemi longkak aita jajadang tangokba noksa nung angur.

### Tir Murmu-i Angh trok shim; state asem nung Angh melentep

**New Delhi, July 28 (Agencies):** Linük Tir, Droupadi Murmu-i Angh tasen trok shimogo aser state asem nung Angh melenteptsüogo, ta Rashtrapati Bhavan sangdong ka ajanga metetdaksü.

Lakshman Prasad Acharya Assam Angh shim aser pai Manipur Angh-a repsema abentsü aser Punjab nung Angh Banwarilal Purohit aliba pa melen Gulab Chand Kataria shimogo.

Rashtrapati Bhavan sangdong ajanga, Acharya-i Chandigarh Union Territory Uikye liasü.

Sikkim nung Angh tasenbaji BJP lenir tain Om Prakash Mathur asütsü.

Jharkhand Angh, C P Radhakrishnan shibai Telangana Angh mapa-a repsema bona liasü; pa Maharashtra Angh Ramesh Bais melentsü.

Taoba mapang Union Labour & Employment Minister Santosh Kumar Gangwar Jharkhand Angh shimogo; pai CP Radhakrishnan melenzüksü.

Punjab Angh menden nungi anensang Purohit-i Punjab Angh menden nungi anenba shidi agütsü aser Tir, Droupadi Murmu-i ibaji agizükogo.

“Sikkim Angh Lakshman Prasad Acharya, Assam Angh shimogo aser pa nem Manipur Angh menden-a repsema agütsüogo,” ta sangdong nung shia lir.

Yaküm February ita nungi Manipur nung Angh, Anusuiya

**NAGALAND HEALTH PROTECTION SOCIETY**  
**METONGSHITSÜR**

Iba Office nungi July 26, 2024 anogo nung osangkakettem nung shirangertem anepaluba atema sen meyipa meshitsü atema agütsüba mapang telatet, anogo aser temetetsütem adokba yamai metongshia zügangma :

i) EP nungi tajanzük angutsü pur shirnok Medical Allowance agiba sülenang treatment agia ali , parnok ajak nem tajanzük senotsüji CMHIS Corpus nungi agütsütsü.

ii) Govt. mapa nung alirtem shirnok Medical Allowance magidang treatment agia ali, parnok nemji pei pei Department-i agütsütsü.

S.No i) & ii) nung senotsü meyipa agütsütsü shia alibaji yamai alitsü :

Senotsü meyipa agütsütsüba (Reimbursement) mapangji 1st November 2022 nungi 31st December 2023 tashi alitsü.

Tanga temetetsütembo ajak metetdaksüba ama kasa alitsü.

Tamalen temetetsütem meshitaki agütsüba ajanga timtem aser makmakshishi kar danga adokdakja lira, onoki taidok meshir.

*(Signature)*  
**(THAVASEELAN K) IAS**  
CEO, Nagaland Health Protection Society

### Tokyo nung S Jaishankar aser US Secretary Blinken na senden amen

**New Delhi, July 28 (Agencies):** Amongnü Japan yimtiba, Tokyo nung Quad Foreign Ministers’ senden jakdang India External Affairs Minister S. Jaishankar aser US Secretary of State, Antony na ajurutepa senden menogo.

Tesülen S Jaishankar-i X ajanga, “Tanü Tokyo nung @SecBlinken ajuruogo. Asen linük ana tsüngda tesendaktep tajungba kümdar. Künati regional aser international onük balala nung o lemtepogo. Asüng Quad FMM senden nung adentsü yongyar,” ta metetdaksü.

Amongnü S. Jaishankar-i Tokyo kübok Edogawa nung aliba Freedom Plaza nung Mahatma Gandhi indang (tekolak) kürakyanglu ka semzükja liasü. Iba sentong nungji Jaishankar den Edogawa Mayor, Takeshi Saito, Indian Ambassador to Japan Sibi George aser tanga minister tem aika liasü.

Kasa sentong nungjisa school tanurtem telok kati Mahatma Gandhi-i kanga sapuba sarasadem ken “Raghupati Raghav Raja Ram” aten. Quad züngsem linüktemji Australia, India, Japan aser United States lir.

### Bengaluru city railway station ka nung azü shi seret 2,700 apu

**Bengaluru, July 28 (Agencies):** Bengaluru city railway station nung train nung shibelenba azü shi seret 2,700 apu ta osang proka liasü, ajisüaka Food Safety Commissionerate nung ketdangsertemibo ibaji napong shi liasü, ta metetdaksü.

Hokolbarnü Police-i box 90 nung shi seret 2,700 apu, aser shiji Jaipur nungi train ajanga bener aruba liasü. Train station nung shi apuba sülen Hokkolbar nikongdang iba tesem nungji nisung aika adenshia azü shi shibelenba anema longkak ait tenzüka liasü.

Hindu right-wing züngsemtemi, state balala nungi azü shi bener arua Bengaluru nung ayoker, ta tai tongloktsü, ajisüaka Hokkolbar nikongdang Bengaluru city railway station atongba box nung aliba shiji napong shia liasü ta ketdangsertemibo metetdaksüogo.

Iba tatalokba dak sendakba nung Hokolbar aonung police-i FIR asem benok. “Mezüngbuba FIR ji shi shibelenba liasü, aser ibaji azü shi den meyoktepa abenba lir ta melung melemi benokba lir. Tanabuba FIR ji nashi kümzükter züngsem ka, Puneet Kerehalli anema liasü, kechiyong pai food quality department nung ketdangsertem duty inyakdang parnok nem timtem agüja liasü. Tasembuba FIR ji Puneet aser pa den külemi inyaksemer pezü anema liasü; lokti aliba tesem nung ozüng alema adenshiba atema parnok anema FIR ji benok,” ta Amongnü police tongti ketdangser kati osangbener nem metetdaksü.

Commissioner of Food Safety, K Srinivas-i, “Bengaluru nung azü shi mayoker aser parcel nung bener arubaji napong shi liasü. Mezüngbuba nung shiji azü shi masü saka ‘Sirohi’ ta ajaba napong shi liasü. Iba napong tapu ya Rajasthan aser Gujarat kübok Kutch-Bhuj tesemtem nung kanga bulua angur.

Item napong tapu indang tepenji/tachilakji talang aser ‘spots’ keta lir. Anungji nisungtemi ibaji azü tepen/tachilak den aiteptsü,” ta metetdaksü.

Paisa, “Samples tendangba ajanga azü shi masü ta jangjaogo. Napong shi agi kanga anünga agi shishilemar kari napong shiji tanga state atem nungi bener arua yangi (Bengaluru) jenjang dalang agi ayoker,” ta metetdaksü.

Gandhi Krishi Vigyan Kendra (GKVK) nung animal sciences professor, B L Chidananda-i, “Karnataka nung san tapu aika lir, ajisüaka napongbo tapu aika mali. Ibayongji Bengaluru aser state tesem balala nung nung ‘chevon’ napong agi shilem 25-30 agi meperir. Bengaluru densema state kübok district aika nung shi achir aika lir, ibayongji shishilembartemi iba timtem angateta tanga state nungi napong tapu balala bener arua jenjang dalang agi ayoker,” ta ashi.



Haridwar, July 28, 2024: Hindu nung temeshi ita ‘Shraavan’ nung temeshi aini aoertemi Haridwar nung aliba Ganga ayong nungi temeshi tzü atadang tangokba noksa nung angur.

**पावरग्रिड POWERGRID**

**SANGDONGER**

- Electricity Act, 2003 nung Section 62 nung ajemdaker **North Eastern Region Strengthening Scheme-XII** kübok Transmission tariff for 2019-24 tariff block asadanga amenoktsü aser transmission tariff for 2024-29 tariff block for Assets atema petition meshir. Item maparen ya Section 62 read with Section 79 (1) (d) of Electricity Act, 2003 aser Regulation 15 (1) (a) and Regulation 23 of Central Electricity Regulatory Commission (Conduct of Business) Regulations, 2023 read with Central Electricity Regulatory Commission (Terms and Condition of Tariff Regulations) 2019 aser Central Electricity Regulatory Commission (Terms and Condition of Tariff Regulations) 2024 kübok inyaksü.
- Tekalen shia aliba Transmission system ajanga tajanzük angutsüpertemji: (a) Govt. of Arunachal Pradesh (b) Assam Power Distribution Co. Ltd. (c) Manipur State Electricity Distribution Co. Ltd. (d) Meghalaya Energy Co. Ltd. (e) Power & Electricity Dept. of Mizoram (f) Dept. of Power Govt. of Nagaland aser (g) Tripura State Electricity Board lir.
- Tariff details:

Name of the Asset	Asset-1 : Re-conductoring of 132 kV S/C Jiribam – Loktak Transmission line with HTLS conductor	Asset-2 : Re-conductoring of BTPS-Salakati 220 kV D/C line with Single HTLS conductor (Ampacity of single HTLS shall be 1100A) along with upgradation of associated bays at Salakati (POWERGRID) and BTPS (AEGCL) Substations
Schedule DOCO (FR)	31.03.2023	31.03.2023
DOCO (Actual)	01.04.2023	13.01.2024
FR Approved cost (Rs in Lakhs)	3026.08	1209.96
Estimated Completion Cost (Rs in Lakhs)	2773.54	858.55
Tariff for the year (Rs in Lakhs)		
2023-24 (pro-rata)	367.00	19.03
2024-25	414.91	102.24
2025-26	439.43	125.47
2026-27	428.38	136.05
2027-28	417.47	132.40
2028-29	405.31	128.75

- Determination of tariff atema yangluba application copy ka applicant indang website [www.powergrid.in](http://www.powergrid.in) nung agüja lir.
- Beneficiary densema nisung mashii kati file asütsü aliba application nung determination of tariff proposals nungji tebilemba onük mesüra tashishiba kar danga lira iba sangdong agütsüba sülen anogo 30 tsüngda Secretary, Central Electricity Regulatory Commission 6th, 7th & 8th Floors, Tower B, World Trade Centre, Nauroji Nagar, New Delhi-110029 (mesüra Commission indang office aliba tanga address) matsüngdang benokang, aser corporate office indang address nung copy ka applicant nem agüjang.

Place: Gurugram Sd/-  
Date: 23.07.2024 CM (Commercial)

**POWER GRID CORPORATION OF INDIA LIMITED**  
(A Government of India Enterprise)  
Reg. Office: B-9, Qutab Institutional Area, Katwaria Sarai, New Delhi-110016  
Corp. Office: “Saudamini” Plot No. 2, Sector-29, Gurugram-122001, (Haryana) Tel.: 0124-2571700-719  
[www.powergrid.in](http://www.powergrid.in), CIN: L40101DL1989GOI038121

**A Maharatna PSU**



## TIR YIMYIM YIMOBILEM (EDITORIAL)

DIMAPUR TENTONÜ, JULY (CHITENI) 29, 2024

### Sen meshiba tebilemstsü

**S**en meshitsüba yabo temela asütsüa akok saka agütsütsübaaji tasak kechiyong makara agütsünüyonga magütsütettsü aser akayonga kecha kuli aser tangatetba tajung ka melii angati sen agütsütsübaaji tagütsür asoshi dang masü saka tagizüker asoshia majung aser jangramatem tuluka lir. Tanü Nagaland nung asenok mainba timtemji, tanga aika rongnung, tangar mapa inyakertem dang nungi mapa meinyakertemi sen meshiba tebilemstsü ya asütsü. Tangbo joko iba tebilemstsü ya tuluba küma, sen magütsüra, nisung taküm agütsü tashi amokmerenba ajanga Angami Youth Organisation (AYO) –i NSCN-K (Khango) telok den amalitep makatsü telemtetba agiba asenoki angashiogo. Atangji, tagütsütsü lir magütsübaaji majung saka agütsütsü aliyonga sen magütsüba atema nisung taküm agütsü tashi amokmerenbajibo nisung tsüngdanga aser Tsüngrem tsüngdanga magimatsü. Iba dang nung jagi ano angati sen amokmerena meshibajisa tamajungba lir. Sen yabo tanü akatsü aser asüng makatsü, tanü magütsütetyonga asüngbo agütsütettsüa akok saka nisung taküm yabo yamaji masü, tanü tepseta endokbaji teti atema tesama akümer. Iba ama atalokba kibongtem, temeimtsüka aser tesasatsüka, asenok rongnung aika lir. Item jagi taidokbo agütsür asütsü saka tesamaji tesama mulung anisüngzükdak maka, Tsüngremi süneptsütsüba dak alaka nisung tashi agibo makoktsüsa ataloker. Atangji, asenok ama asen sobaliba aser libaliro den memedem aser mapetba kintem denbo yimten yimsüsüba aser temzüng ozüng ka kübokbo külem ser melinüba agi yimten nüchiso bushiba kin asoshi yimten nüchiso atema raratsür telok aser nokinketerem atema saru sarutsü aser saru agütsütsü nüngdaker. Iba atemajibo pei mapa nungi aaba sen nungi ter shilem daka talia agütsütsüla aser peisasa pei taküma tenlatsüla aser aikati tenlaogo. Ajisüaka, tanü ama Naga nunger yimten nüchiso bushir telok paikati India den yimjung yanglua yur, nübortem den yimten temeten indang jembiba senden aser anogobo maka saka mapa inyakertem dang nungi tax aser commission sen dang meshia mongra, ibajibo Naga nungertem nem nüchiso agütsür masü saka timtem agütsür dang asütsü. Iba ama tax aser commission sen jagibo nüchiso tongpang nung tasü aser tashi itta menokdaktettsü aser mapang talangkata meraratettsü. Koba lima aser koba kin südirsüaka, yimten nüchiso atema raraba tongpangji kopiga raratsüar memetet saka mangu tashi putusa putu raraa otettsüsa nübortem dak tangatetba alitsüla aser tongpang raraji telok telok lemsar pei pei raraba tongpang masü saka nübortem tongpang asütsüla. Idangjibo, nübortemi memeshidangyongi pei shilembo agütsür alitsü. Iba tangatetba lenjem jagi Naga nunger telok telemsa ajak ya arur longjemshitsüla aser yimten nüchiso atema raraba tongpang ya X,Y, X aser Ü telok tongpang masü saka Naga nunger külem tongpang asütsüla. Iba amaji ka melongjemtetra, asenoki contractor aser takar aser tulurtem amokmerena tax aser commission meshiba sen agibo nüchiso tongpang nung menokdaktettsü. Atangji, Nagaland nung mapa inyakertem dang sen meshiba tebilemstsü ya Naga yimten nüchiso bushir telok nungi dang arur masü saka iba ama timtem aser tebilemstsü nokdangtsü atema shimtetba yimsüsür MLA aser minister-temi dena meshir ta Nagaland Contractors' & Suppliers' Union purtemi yimjak nung metetdaksübaaji tebilemstsü tuluba lir. Ibjibo mozü kidang doctortemi shiranger aneptsütsü meranger masü saka tashidak tuluba kümdakja sen aatsü meranger amai lir. Joko, Nagaland nung alir Naga nungertembo India nungi Independent angutsü rarar masü saka pei nisung aser pei government nungi tashiyim agi tax aser commission saruba timtem aser takoksa nungi Independent angutsü rarar amai tongpang tasen ka tenzükogo. Iba tongpang rara yabo Naga nunger o Naga nunger tsüngda rarar aser India-i asenok nüngdak sen aser relief jang agütsür repranga atar. Aji oda, asenok ya yimten nüchiso atema plebiscite agiba kin aser nübortembo tak ta memesük kümogo.

## OLEMSABANG

### TANÜ ASEN LIMA NUNG OCHI YIMDONG NUNG LAOA LIR

~ L.Kika Pongener.

*(Yashi adok nungi...)*

Tanü asen lima nung, yimden aser loktiliba ajak nung ketdangsuba mapa reprangdangra, teimba ka ochimashi agi sunga lir. Loktiliba aika nung tanishir (Leadership) raktepba agi sunga lir. Yimden aser loktiliba aika nung senotsü ketdangsuba nung ochimashi agi sunga lir. Tanü yimden/lokiliba aika nung yimsusur/lenniri kijasor/sensaker/tilarbo mezüngshir, saka takar-tulur aser sentsü-keter dang züngshiba lima ka küma-dokogo. Yimden aser loktiliba aika nung yimsusurtem/lennirtem supokrem nung alanger, metetsümonga ochi nembanga yur telemtetba agiba aser obendang agütsüba angudang nuburtem kanga sungmanger...!!!??? Yimden aser loktiliba aika nung tejak reprangba (Partiality) aser ozü, par, onok, parnok ta bendanga benshiba (Ism) agi sunga lir. Tesasatsüka, tanü yimden aser loktiliba aika nung nubur tsüngda nung kati ka akümtsübuba mali, yimden o yimden tsüngda nung kati ka akümtsübutepba mali. Shitakba-bo yimden kati yimden ka akümtsübutepba mali. Kodang Election arudir yimden yimsusur aser lokti lennir aika sen/supokrem nung alanger. Tsüngen tetsütilai sayip-sayipi jajaa sayuba agi techanu ajak sayip-sayipi jajaba ama, yimsusur/lenniri tamasa aibelenba agi nuburtem dang tim o meshiteter, mazüokteter aser nuburtema aibelendaktsür.

Kanga tesasatsüka, tanü asen lima nung ochishirbo lendongbang nung nokdaka lir. Shirnoki yimden aser lokti ajungtsü aser melenshitsü asoshi yabo tim masüa, yabo majunga ta tasü-ita ochi o jembir parnokjibo nubur aikati sempar. Shirnoki ochi jembir parnokbo pei ajangzüktsüba/temoatsü lenmanga aika shibanga-adoker, kechiyong ochishirji shingaia maginur/meyarinur. Yongji ochishirbo sensaka timtema dang alir, kechiyong tanü putu ya tulur-tilar ajaki anemsu agi tenung-sanga jembir dang meimer/aginur. Ajisuaka, Tsüngrem nungi maongka tilaka danga ngura aji teperi. Tsüngrem oi ashir..."Temeli agi mesuzüka nanga jembir dang nungi, nisung arrtsüri tesulen maongka tali angutsü" (A.Shin-28:23). Tanü yimden, arogo, loktiliba tenzükba mapa nunga ochishirbo medenzükdaktsünur/maginur, ochishirbo kinuklen/tezülen agiena ayutsü meranger, kechiyong ochishir aliba agi ochimashirtem mesademer. Kanga tesasatsüka, tanü asen lima nung ochi/shitak to tiyazü/meshitak kümogo, aser ochimashi/tiyazü to-ang ochi/shitak ta langkoshishi meyiptepogo. Jokorla, tanübo ochimashir-ang takar küma jangradema alir aser ochishirbo sensaka timtema dang aliba lima ka kümogo.

Ibjaji tanü asen lima nung tasü-ita ochi jembir mali küma-odagi. Ajisuaka, tasü-ita ochi jembir kar danga melira asen lima ya majungtsü. Kanga tesasatsüka, tanü putu nung, ochi ola madoktsü, ochi mejembitsü aser ochi mezülutsü atema lenmang balala nungi, yimya mapa balala agi, yimden bangdak aser telok-tentet balala nungi amokmerenba, tenarong mesukba aser tatok nangzükdaktsüba, iba amala tashiyim mapa agi ochi songtemtsü/nembanga ayutsü meranger. Ajisuaka, ochiji tiyazü aser amokmerenba agi kodanga nembanga meyutettsü. Ochiji kenubo pa sasa jungkai adoktsü. Anungji tenokdangba aika liaka ajakji arema tasü-ita ochi ola adoktsü metsübutepba. Tsüngremi asen taküm arishi magien tashibo, sorkar nungi tenzükter tilatiba loktiliba (Grass root level) tashi nung tim masüba, ochimashi mapa anema tasü-ita ola adoktsü, jembitsü aser zülutsü metsübutepba. Kechi tensa tia ajurudir ajuruaka, ochi nung ameter masetshitsüla. Tanü asen lima nung ochishir, tasütait, nungsen metsübui ola adoker kar melira, asen lima teraksa ya meyanglushitsü.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir**

# Japan nunger Khristantemi Israel nem ambulance tenla agütsü



Japan nung Bridges for Peace nung Director, Megumi Tabata-i Jerusalem nung aliba MDA headquarters semdangba mapang tangokba noksa nung angur.

**July 28, 2024:** American Yihuda nungertemi Israel nunger nem mapang shia ambulance tenla agütsür, ajisüaka Japan nunger Khristantemi Israel nem ambulance agütsüba osangbo mangashidang.

Ajisüaka Japan nunger Khristantemi Israel nem ambulance ana tenla agütsüogo aser taruba ita ishika tsüngda ano ambulance asem agütsütsü.

Japan nung Bridges for Peace nung Director, Megumi Tabata-i, "Joko Japan nunger Khristantemi tenlaba ambulance ni angutsü, iba atemaji ni pelar. Ni Japan tesem ajaklen Arogotem semdang aser Israel atema tenla agüjang aser sarasademjang ta Arogotem dang mepishir," ta metetdaksü.

Laisa, Bridges for Peace organization den register süa

aliba Arogo 630-i yaküm October 7 nungi tenzüka Israel aser Israel sepaitem atema sarasademsür, ta metetdaksü.

Japan nung Khristantemji nütsüng shilem 1 dang nungi ishiba lir saka parnoki Israel pusemer aser Khristan yimsü teraji Yihuda nunger yimsü nungi lir ta bilemer.

Tabata-i, "Japan nunger Khristantem atema Israel ya tongtibang. Yihuda nunger aser Israel ajanga onoki temoatsü kanga angur. Onok yimsü teraji Israel nungi lir. Onok atema Yihuda nungertem ya odila aser oyalala nungertem ama lir. Ni Laishiba nung aliba Ruth otsü kanga meimer, talisa lai 'Nü Tsüngremji kü Tsüngrem asütsü aser nü nüburtmji kü nüburtm asütsü' ta ashiba ni meimer," ta ashi.

Israel nem intensive care ambulance tenla agütsütsü atema Japan nunger Khristan

meyirjang aikati tenla agütsüogo; item ambulance ka nung dollar sen 150,000 adoker, ta lai ashi.

Magen David Adom (MDA) indang Fundraising Department nung Director, Yonatan Yagodovsky-i Tabata dang ambulance nung aliba osettem sayu aser Tel Aviv area nung iba ambulance anishitsü lemezükja alisang, Yoram metetpelaja liasü.

Ambulance meshitetsü jakdang Tabata-i yaküm October 7 nü Hamas teloki Isreal nunger amakba tesem-Nova music festival area aser Kfar Aza na semdanga liasü.

Yagodovsky-i la dang, yaküm October 7 nungi Magen David Adom-i Israel nunger atema kanga tongtibang shilem agidar, ta metetdaksü.

Israel-Hamas tsüngda rara nung MDA nungi staff aser volunteer 35 tepsetogo.

# ANO GO ABEN TSÜNGREM DEN

## Talenba Kübok Masü

"Asen tejen nisung pa den kangki nung angenlok, joko asenok talenba kübok mali"

(Rom 6:6)

Kechiba tejenbaji asütsü nüngdak ? Tejenbaji peisasa aliba aser Tsüngrem dang tashi mangai liasü, anungji asenok alar tia nung joko malitsü asoshi tejenbaji asütsüla. Tasübaji tesendaktep tatem akümba ka lir, saka taküm alibaji samaba masü. Temenenji mesüi lira; ibaji maneni tashi itta alir. Saka kodang na tejen taküm Khrista den kangki nung asü, na temenen den sendaktepa alibaji teti asoshi raksar. Ne tejen taküm (temenen nisung) aser tejen yimya (jakla) oadoker aser na Tsüngrem nungi pilaa malir.

Iba tetezü, na tang temenen meli-i akümer asü ? Masü. Na temenen nungi pilaba jagi temenenji taküm melii akümer ta masü. Temenen aser satan asenok meketa tashi itta lir. Saka kangki tashi ajanga temenen ain samatsü. Nai joko temenen metenzüktsü.

Na kodang Tsüngrem nungi pilaa liasü, nai pelaseta temenen inyak. Kodang nai tejen taküm yimya nung lidir, tasenba taküm yimya raksar. Itemji nangzüktsüla aser doktsütsüla.

Na tejen taküm süra, na maneni shi nung alir. Tejen taküm Khrista den kangki nung asü nung, nai temenen memenatsüsa shimtetsü akoktsü. Na joko shi nung masü Tanela nung jajar. Na nüji kümogo.

Oba, ne dangi marudang shi lenmangtem nung jajaya aliba koktetsüsa yariang.

# Uttar Pradesh nung Khristan apuani na apuba sülen kabo chiokogo

**July 28, 2024:** Uttar Pradesh state kübok Azamgarh district nung Khristan apuani na pua jail nung puok, saka July 18 nü kinüngtsübo chiokogo.

Anti conversion ozüng kübok pastor Sanjay Kumar aser pa kinüngtsü Sunita na apuba sülen labo ita ka shi lir jail nungi chiokogo. Taküm June 20 nü Jahanaganj nung hopta shia

ayongzüka agiba tekülem sentong ka agidang tena pua liasü.

Interview ka nung jembidang Sanjay Kumar-i aniba Arogo nung lenir, Rahul Kumar-i, "Tesüba mapangtem nungbo onoki kodanga timtem majangshi. Yimdaklir ajaki pastor kanga junga meteta lir aser pai hopta shia tekülem sentong ayongzüka agibaji shingaia mashishii aruogo," ta metetdaksü.

June 20 nüji anüngdang 11:00 ako nungi nikongdang 1:00 ako tashi tekülem sentong agitsü liasü saka sentong tenzüka sülen minute 30 shi dang lirbo police arua timtem agütsü.

Police-i arrshi küm42 pastor, Sanjay Kumar aser pa kinüngtsü Sunita na apu aser züngsem 12-13 shi amokmeren aser pastor apuba anema ola madoktsü tuyu.

"Tekülem sentong agiba kiojen kiburji Khristan masü aser yimdak tongti yimsüsür liasü aser pa den yimtenren nung tsükchirji BJP lenir ka liasü, ta tesülen ang onoki metet," ta Rahul-i metetdaksü.

"Yimtenren nung tsükchitepa ajanga pai police dang, yimdak tongti yimsüsür meyong kiojen nung Khristan yimsü dangi meyipdaksüba sentong agidar, ta metetdakja liasü. Iba sülen police arua Sanjay aser Sunita na police station-i anir ao aser ayaterm tashi nung ang First Information Report (FIR) ka benoka liasü. (Maneni tapak 8 nung...)

# Zone 5 & 6 asoshi Khar Baptist Arogo nung Lanujen Waden sentong agi



**Mokokchung, July 28 (TYO):** Maneni ABAM Literature & Education Ministry ajanga Lanujen Waden Zone 5 & 6 asoshi July 26-28 anogotem nung "Kümdangdi" Kolosi 2:8 omen nung Khar Baptist Arogo nung sentong kanga dang junga agiogo, ta ABAM Executive Secretary, Rev. Dr. Mar Pongener-i sangdong ka ajanga metetdaksü.

Sentong nung O jembir Dr. Moanungsang, Tzüdir, Secretary, Education &

Literature, ABAM ajanga asüng asoshi tanü tanurtemji metsü tajung shiteta ayuba aser tarutsü mangdang tajung ayuba, ta angateta Ministry ajanga kanga nendaka sayua arurdar. Anungji iba ministry ya tarutsü mapang asoshi teimla ta angateta bendanga agüja sayutsü ayongzük.

Sentong nung onük jembirtem Kongro. Moanaro Asso. Pastor, Christian Education, Kümlong BA, Wabong. Imsentiba Jamir, Coodinator, Sunday School

Ministry, ABAM, aser Watsü. Abenla Aier, Coordinator, Children Ministry, ABAM nunger liasü.

Iba sentong nung Mangkolemba BA Christian Education Ministry ajanga kenten ania liasü aser Kongro. Moamenla APCE, Dibuia BA aser Sangbang. Lumong, ABCE, Changkiyimlang BA kütdangpur liasü.

Iba sentong nung Arogo 22 nungi delegates 432 arua aden. Khar Baptist Arogo ajanga

iba sentong achaayangba dang masü saka chiyunga ajemba ajak agütsüba asoshi pelaba lemsateper aser Tsüngremi Khar Baptist Arogo maneni moajangma ta sarasademsür, ta sangdong nung shia lir.

Maneni ABAM Literature & Education Ministry yakbang süa Arogotem nung Children Ministry ajanga tanurten ochi lenmang nung ania aodang Tsüngremi ochi meimer lanurtem aika adokdakjang ta sarasadem.

### AO OSHI ANGAZÜKDAK: TANÜ ANGAZÜKTSÜBA OJANG



#### Taktang

(n) ki telung nung ki lemsaba (partition, room)

\* Ozü kidang taktang aika lir.

#### Taktepsü

(n) sentsü balala keta atakba sü ( multi - colored woven cloth)

\* Naga kintem sü teimbaka taktepsü lir.

### OLONG PAITEP # 6859

1				2				3		4
5		6								
						7				
8										
										9
		10				11				
				12				13		
14										
						15				
16										

#### TIPILEN

- 2. Auonungchiyongsüasenba
- 5. Mangyimba mapang
- 7. O tamendakdak
- 8. Peidak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

#### LANGTSÜNGLEN

- 1. Lenmang
- 2. Aor kidong ka tenüng
- 3. Tenarong maten
- 4. A \_\_\_ g
- 6. Mopung apodoka
- ola adokdaksüba
- 9. Tonglipang tagitsü
- 10. Menungra bilem
- 11. Aiür
- 13. S \_\_\_ k
- 14. T \_\_\_ r

### OLONG PAITEP # 6858 TELANGZÜBA

#### TIPILEN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tassen, 13. Lemjem,
- 15. Tambu, 16. Khuret,
- 17. Sang.

#### LANGTSÜNGLEN :

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok,
- 12. Amang, 14. Jala.

### NAI-A YA METETTER MA



Tetsüng mali asor Kanya Sesser-i Guinness World Records ka ngutetogo. Arishi küm 31 tain Kanya Sesser-i "longest handstand on a skateboard (LA3)" otsü yanglutet ta Guinness World Records ajanga metetdaksü. La ya athlete, actress aser runway model ka lir aser Los Angeles nung 19.65 seconds nung otsü tasen yanglutet,

### Cachar Police-i Rs 9 crore alang drugs apu

**Guwahati, July 28, 2024**  
**(Agencies):** Cachar Police-i July 28, 2024 nü Kathakal nung special operation ka agidang Rs 9 alang drugs apu.

Osang tejangja ka angazükba nung ajemdaker mita aodang nisung ka ket nung Yaba süngjang 30,000 bena aliba apu.

"Osang tejangja nung ajemdaker Cachar Police-i tanü Kathakal nung nisung ka ket nung Yaba süngjang 30,000 puogo. Assam Police-i #DrugFreeAssam atema maneni inyakba atema tenüngsang agütsür" ta Assam Chief Minister Himanta Biswa Sarma-i ashi.

Police-isa tanü drugs shibelendang amshiba gari ka apu.

### SÜR KÜM KA AJUNGBA ANOGO BILEMTETBA



**Asür. Rev. Yapang**  
 (27th Dec. 1937 - 29th July 2023)

Küm ka süiogo tanü iba anogo nung na Kibuba den teti alitsü asoshi onok toktsür aodang onok tenük nungi nüktzü ayimba manen. Tanüa onok akümlirtemi anogo shia tensa tia balala ajurudang na bilemteter, menunrar aser temulung ayanger. Saka künü anogo asenok ajak ajuruteptsü tamang teimla nung onok sasa anisüngzüksü meranger.

Na alima nung Tsüngrem lar ka alidang "Kibuba matsüngdang pa temeshipur asüba senti lir." ta jembiba to tanübo na Pa matsüngdang senti kümer pa den ali nung onoki mesasar aser mejashir saka Pa tenüng dang asanger.

Majuruteptashi.

- Temeim kinüngtsü, Chirnur, Semchir aser kinungertem.

### Congress MP Gaurav Gogoi-i Union Budget atema BJP aitsür

**Guwahati, July 28, 2024**  
**(Agencies):** Bharatiya Janata Party (BJP)-i tawa sangdongba Union budget nung linük ajunga sendokba aitsür ta Congress MP Gaurav Gogoi-i ashi.

BJP-i aluyimertem, kaketshirtem, tax agütsürtem aser jila o yimitem nung alirtem sendokogo ta Gogoi-i ashi.

BJP aser Prime Minister Narendra Modi-i aluyimer nem Minimum Support Price (MSP) atema ozüng tajung meyanglu ta pai ashi.

"BJP-i India nung kaketshirtem mokdang aser parnok indang higher education exams maneni athir. Parnoki indexation nung tajanzük agiena

meranga inyakba taxpayers mokdangogo" ta MP Gogoi-i ashi.

BJP-i linük nung infrastructure, railway lines aser bridges tajung meyanglu aser jila o yimitem nung alirtem mokdang, ta paisa shisem.

"BJP-i sorkar kümzüksü aser industrialists tulu 2-3 yaritsü dang jangrar. Iba ajanga Niti Aayog senden nung INDIA bloc-i BJP mokdang" ta Congress MP-isa ashi.

"PM Modi tashimait. PM Modi teyarir mali. CM Nitish Kumar aser CM Chandrababu Naidu na pela meyutsüra par sorkar loksatsü ta pai meteta lir aser pa kümzüksü atema pai

India tanüngba ashioktsüogo, senzükogo" ta Gogoi-isa metetdaksü.

"Bihar aser Andhra Pradesh nung assembly election sangküm ang lir saka parnoki joko India tanüngba amadoktsü tenzükogo. Taküm budget ajanga political party ana nem dang tajanzük agütsür süra sangküm budget jia kasa dang asütsü" pai ashi.

"Sangküm JDU nem tajanzük teimba agütsütsü" ta Gogoi-isa ashi.

Haryana, Maharashtra, Jharkhand aser Jammu and Kashmir nung onoki BJP dang tansütsü sayutsü ta Gaurav Gogoi-isa ashi.

### Agartala railway station nung Bangladeshi nunger 23 apu

**Agartala, July 28, 2024**  
**(Agencies):** Tripura kübok Agartala Railway Station nung Deobarnep Bangladeshi nunger 23 apu. Parnok ya oziung alema Chennai-i aotsüba sentong liasü.

Bangladeshi nunger telok ka aruba osang onok dang sangoktsü ta Agartala Railway

Station nung Officer-in-Charge Tapas Das-i ashi.

Iba osang angazükba sülen BSF, Railway Protection Force (RPF) aser tanga agencies-i railway station nung entry aser exit points mendanger ataa aliasü.

"Mezüngbo onoki temulung melemer bilemer nisung 10 apu.

Iba sülen BSF-i nisung 7 apu aser tatem nung Bangladeshi nunger 23 apu" ta OC Das-i ashi.

Parnok Tripura-i oziung alema aruba aser Chennai-i aotsü merangba atema ken o ka benokogo. Police-i parnok okadaki anir ao aser parnok ket nung ayutsü temelaba meshiogo.

### SC judge Justice Kotiswar-i Manipur Governor den ajuruteptep

**Imphal, July 28, 2024**  
**(Agencies):** Supreme Court of India nung tawa tasen shimba Judge Justice Nongmeikapam Kotiswar Singh-i tanü Manipur Governor Anusuiya Uikey den ajuruteptepo.

Manipur nungi Supreme Court judge mezüngbubaji Justice N Kotiswar Singh lir ta Raj Bhavan sangdong ka nung ashi.

Governor Uikey-i Justice Kotiswar nem tenüngsang agütsü aser pai mapa tajung inyakba atema pelaba metetdaksü.

Laisa Justice Kotiswar wadang tasen atema moatsü aser pa shimba ya Manipur state atema kanga tongtipang lir ta ashi.

Honibarnü City Convention Centre, Imphal nung High Court Bar Association of Manipur (HCBAM) aser All Manipur Bar



Association (AMBA)-i Justice N Kotiswar Singh nem tenüngsang agütsü.

Manipur nung kin ana tsüngda mangatettep adoka raradang taküm aser kiojen

samaba atema sasa bilemer ta Justice Kotiswar-i ashi.

Manipur nung akhi ama tensa arutsü tashi lir aser yimjung o teputep adoktsü koka lir ta Justice Kotiswar-isa ashi.

## Venezuela election nung vote agütsütar



**Caracas, Chiteni/July 28 (Agencies):** Venezuela nung Deobarnü election agitar, koba tang yimsü tesüdak PSUV party küm 25 tejakdang yimsüsüba mendeni arur tayongzükba tulutiba ta ashir.

2013 küm Hugi Chavez asüba sülen tir inyaka arusang Nicolas Maduro ya kümsük tasembuba atema tokteper.

Pa den tokteper tesashiba ya Edmundo González lir, shiba taoba mapang diplomat ka liasü aser opposition party temi kumtetba coalition kati yarir.

Polls agiba nung tang teinyakdak tir dang González jenjang tajungba sayur, saka 2018 küm Maduro tanaben shimtetba election ya ozüng nung aliba ama magi ta ashi, anungji taküm election result nunga parnoki teka sangshitsü südi ta nüburtemi temulung melemi bilemer.

Maduro-i pa yarirtem dang kechi südir süaka election nung takok angutsü ta ashiba ajanga tetsübo tali akumer.

Ano linük nungya election

inyakyim meita reprangtsü independent election observers kanga ajema lir, United Nations nungi pezü aser Carter Center nungi technical team tilaka dang lir.

European Union observers jaokba electoral authority tekolakbai agientsü, shiba Tir Maduro indang tembar tajung ka lir.

Ajisüaka Maduro-i par sorkar den tesendaktep tajung aliba linüktem nungibo observer tem jaoka liasü.

Kasa mapang opposition temi ballot station tem nung tenük kuli ama nisung meyerijang aika yoka lir.

Küm tenzüker nübuyimba dak sendakba nung nisung 100 dak tema apuba aser mapang shia merenshiba densema opposition temi tetsükdaktsü balala ajuruaka parnoki akoktsü teimla lir.

Opinion polls nung par candidate-i Tir Maduro dang kanga agi timba angur alinung pai election auyatsü makoktsü ta ashir.

Opposition temi amshiba opinion polls ya sorkari magizüker aser par candidate jenjang tajungba nung lir ta ashir.

Maduro-i o tamajung jembia pai tamakok ajurura azüdokshi alitsü ta ashiba yong Brazil indang left-wing lenir Luiz Inacio Lula da Silva-i Maduro dang 'Nai kokra na yimsüsüba nung alitsü, saka nai mokokra na aotsü,' ta shia liasü.

2018 election nung pa tanaben shimba sülen opposition lenir Juan Guaido-i pa atsüngdoktsü meranga tir shidakbaji pa lir ta sangdong, saka Maduro-i soita ayu.

US aser EU densema linük 50 dak temai Guaido bhukuma liasü aser Maduro ya Venezuelan security forces dak dang tamang kar liasü.

Tatem nung Guaido indang parallel government ya sama aser Maduro-i ibaji amshia pa Venezuelan sovereignty kumzükba ayur lir ta jembia.

Opposition tem lungjemer María Corina Machado yaritsü lemtet, saka pa election nung shilem magitsü tenokdangba agütsü.

Sorkar nung temelenshi aginer temi lungjemer arishi küm 74 tain Edmundo González sülen nokdaka lir.

Venezuela nunger nisung million 7.8 shi linük balala nung jenoka lir, aser Maduro-i takok ngura ano tali jena aotsü ta ashir.

Voting ya electronic nung aser result ya CNE ajanga kasa aonung sangdongtsü imlar. Shibai iba election nung takok ngudir January 10, 2025 nung tenangzükba agia office nung amentsü.

## Tir Wickremesinghe-i Sri Lanka tir election nung tokteptsü



**Colombo, Chiteni/July 28 (Agencies):** Sri Lanka Tir Ranil Wickremesinghe, shibai sen agi anünga aliba asetkong linük ya 2022 küm sentsüh agi tsübanger aliba tia nungi anitet, pai September 21 tir election nung tokteptsü tab Honibarnü sangdonga liasü.

Hokulbarnü iba linük indang election commission-i tir atema election ya September 21 nü agitsü sangdonga liasü.

Honibarnü linük south tsütsü Galle jila nung sentong ka nung jembidang, "Tanü ni iba jilai aruba ya balaka lir, tir election nung ni tokteptsü ta tanü sangdonger," ta arishi küm 75 tain Wickremesinghe-i ashi.

Par United National Party (UNP) ya tashi meiti nokdaka lir asünung pai tir atema metokteptsü südi ta bilema liasü. 2020 küm UNP ya kanga mejungi sadanga Samagi Jana Balawegaya (SJB) tentet, koba tang opposition party tulutiba lir.

"Küm ana jakdang ni mapa tasak inyakba angateta ajaki ni yaritsü imlar," ta Wickremesinghe-i linük rongsenketzüng nung timtem ajuruba athishia ashi. Paisa finance minister mapa bena lir aser 2022 küm rongsenketzüng

tsütsü mepetmesü adoka tashi tait Rajapaksa'er kibong yimsüsüba menden nungi atsüngdoka liasü.

Tir Gotabaya Rajapaksa menden nungi alung ta takhangba agüja nüburtem yimti-yimtung nung longkak aitba mapang ka Wickremesinghe ya 2022 küm May ita ato kilonser akum.

Nüburtem ita asem longkak aitba sülen Rajapaksa linük nungi jena ao aser tir menden nungi alua liasü.

Iba sülen Rajapaksa'er SLPP teyari nung parliament ajanga Wickremesinghe ya tir shima liasü.

Pai International Monetary Fund teyari angutsüsa mapa inyaka rongsenketzüng jenjang tajungba kumdaktsü, saka iba inyakyim nüburtemi pa mesakloki akum.

"IMF reform programme den asenoki tang inyakba dak alaka danga lenmang mali, anungji ajaki yaria ano iba ama tiai meyoxtsüla," ta pai ashi.

Pai Rajapaksa'er kibong indang Sri Lanka Podujana Peramuna (SLLP) nungia teyari angutsü imlar, saka SLPP nung telemsa adoker kari pa yarir aser kar opposition SJB den dena lir.

## Israel-i Lebanon nung Hezbollah tesep balala amak

**Tel Aviv, Chiteni/July 28 (Agencies):** Israel-i atsünger aliba Golan Heights nung football asayaba tesem ka amakba dak sendakba nung telangzüba agütsütsü atema yimden yimsüsürtem aser military lenirtem sensaksema mapang Israel military-i ashiba agi, parnoki Lebanon nung anüng ajanga tesem balala makogo.

Military-i Deobarnü ashiba agi, parnok indang jet temi Lebanon anütoklen Bekaa Valley nung Shabriha tesem, Tyre yimti anasa Burj el-Shemali aser Kafr Lila, Rab al-Thalathine, Khiam aser Tayr Harfa yimtsügtep nung prangbong injang aser hadir balala bendena ayuba tesem aser Hezbollah pur indang infrastructure balala makogo.

Israel indang foreign ministry-i Deobarnü ashiba agi, Hezbollah puri alimela inyaksangshio. Iba telok yagi Golan Heights nung football asayaba tesem ka rocket amshia amakba sülen nisung 12

tepseta liasü. "Honibarnü nisung tepsetba ya Hezbollah puri alimela inyaksangshiba ka lir. Iba ya army kati army ka amakba masü, saka kiralongrar telok kati civilian tem asa amakba ka lir," ta ministry-i ashi.

Iba tesem amakba ya Hezbollah pur magizük. Osang ajanga ashiba agi, Israel indang interceptor missile ka ajanga iba lendong ya ataloka liasü, ajisüaka osang tejangja memetet.

Iran indang Ministry of Foreign Affairs-i Deobarnü sangdong ka ajanga, Majdal Shams nung tatalokba dak atemer Lebanon nung jenjang tasen magitsü tekümdangtsü metetdaksüogo.

"Ita 10 tashi Gaza Strip nung Palestine nunger tanur aser tetsürtem temsepba sülen Israel-i iba inyakyim nung nüburtem meranglokdaktsütsü atema tasa asa inyaksangshitsü meranger," ta otongdar Nasser Kanaani-i ashiba den, iba tesem maneni mesüngjemteti

kümdaktsütsüsa jenjang agira aji Israel khuret asütsü, ta shisem.

Lebanon nung Beirut nungi Al Jazeera osangbener Zeina Khodr-i ashiba agi, tang Israel-i tesem balala amakba ya Hezbollah pur nem osang ka agütsüba dang lir aser parnoki nangzükba ama inyakba ka masü.

Khodr-i ashiba agi, Israel-i telangzüba agütsüba ajanga arrtsü nung mangatettep adoker aliba jenjang melenshitsü akok.

Deobar anepdang lendong atalokba tesem nungi Israeli military chief Herzl Halevi-i video osang ka ajanga ashiba agi, warhead seret 53 bener Iran nung yangluba Falaq rocket kati iba football asayaba tesem kongshia liasü. Iba rocket ya taoba küm October ita nungi Hezbollah puri arrtsü nung amshia arudar.

"Iba ya Hezbollah pur indang rocket lir, aser shirnoki iba rocket ya nüburtem aliba tesem nung khaloktsüogo,

parnoki civilian aser tanurtem tepsetner," ta pai ashi.

Halevi-isa, linük anütoklentip nung rara tanabuba jenjang asoshi Israeli military tali renemshidar, ta ashi.

Kasa mapang nung Israel Ato Kiloner Benjamin Netanyahu-i, Golan Heights nung tesem ka maka lanur 12 tepsetba khuret ya Hezbollah puri abentsü, ta tekümdangtsü metetdaksüogo.

"Israel-i iba tesem amakba atema telangzüba magütsüibo malitsü aser Hezbollah puri iba taah ya aotsü, koba parnoki tang tashi nung khen danga aodanga mali," ta Netanyahu-i ashi.

Israel PM office sangdong ka ajanga ashiba agi, Netanyahu-i pa takaratiba nung United States nungi meyipa arutsü telemtetba agiogo, kong pai tir Joe Biden den ajuruteper aser iba hopta tetenzüklen US Congress den sensaksema liasü.

Israeli military-isa, Hezbollah nem telangzüba ka

agütsütsü atema parnok renemtsü, ta shiogo.

"Iba tesem amakba ajanga Hezbollah pur ya kechi aji jangja jangja sayuogo. Parnoki ya kiralongrar telok ka, shirnoki Honibarnü nikongtsütsü tanurtem football asaya aliba maka tepsetogo," ta Israel Defense Forces (IDF) otongdar Rear Admiral Daniel Hagari-i ashi.

United Nations, United States aser European Union nunger ajaki iba tesem amakba aitsüogo. UN aser EU napronglai telok ajak dang azüzüktepba inyaksangshia rara adoktsü ana nung aliba nokdangtsü mepeshia metetdaksüogo. Kasa mapang nung EU foreign policy chief Josep Borrell-i iba ken o b u s h i s ü n g d a n g t s ü ayongzükogo.

Gaza nung rara tenzükba sülen Israel-i Lebanon nung tesem balala amakba mapang nisung 350 dak tema tepsetogo aser Israel nungera 20 dak tema tepsetogo.

## Sri Lanka team-i tang mezüngbuba tetsür Asia Cup kokogo



**Chiteni/July 28, 2024**  
**(Agencies):** Deobarnü tetsür Asia Cup final nung India team wicket ti agi koka Sri Lanka tetsür team-i tang mezüngbuba Asia Cup kokogo.

Asia Cup (ODI aser T20I formats) tekububa nung tang agi tanabenbubang India team final nung tsükogo. 2018 küm final nung parnoki Bangladesh mekoki liasü.

Run 166 arishiba mapang Sri Lanka team nungi captain Chamari Athapaththu aser Harshitha Samarawickrama nati kanga junga asaya liasü.

Athapaththu-i ball 43 nung run 61 yanglu, kong four teku aser six ana densema liasü aser Samarawickrama-ia out mesüi ball 51 nung run 69 yanglu, kong

four pezü aser six ana densema liasü.

Tena senteper run 87 yanglua liasü. Athapaththu-i ball 33 nung half century yanglu aser Samarawickrama-i ball 43 nung half century yanglua liasü.

Athapaththu out asüba sülen Kavisha Dilhari ait aser laia ball 16 nung run 30 yanglu aser lai Samarawickrama den külemi run 73 yanglua Sri Lanka team-i iba asaya koka liasü.

India team batting amenba mapang parnoki asayar 6 out sür run 165 yanglua liasü. Parnok rongnungi Smriti Mandhana-i ball 47 nung run 60 yanglu. Lai four ter azük. India tsürtem rongnungi ano Jemimah Rodrigues (Run 29; Ball 16) aser Richa Ghosh (Run 30; ball

14) natia teyari agüja liasü, ajisüaka Sri Lanka nung spinner temi India tsürtem nem timtem aiben agüja liasü.

Sri Lanka team nungi bowler tem rongnungi Dilhari-i ball kanga junga ona lai run 36 agütsür wicket 2 agi.

Mandhana-i kanga kümdanga asaya saka India team nungi middle-order temi run sadem sadema meyangluteti liasü aser asaya tatemlen Ghosh aser Pooja Vastrakar nati tera junga asayaba ajanga India team-i run 160 adena yangluteta liasü.

Sri Lanka team-i bowling kanga junga aonba den batting-a kanga junga amenba sülen parnoki asaya kokogo, koba parnoki akoktsü langa liasü.

## Eng vs West Ind: England-i tasembuba Test kokogo

**Chiteni/July 28, 2024**  
**(Agencies):** England aser West Indies na tasembuba Test asaya England-i wicket 10 agi kokogo.

England nung bowler Mark Wood-i ball kanga junga ona wicket pongu agiba sülen England-i iba Test asayamung nung tasembuba asaya koka iba asayamung kokogo.

Edgbaston nung tasembuba anogo West Indies puri wicket 2 out sür run 33 yanglur asaya tenzük ajisüaka lunch break agiba sülen Wood-i ball kanga junga aon tenzük aser pai over trok nung run 9 agütsür wicket

5 agia liasü.

Asaya akoktsü atema run 82 nungdaka England pur tanabuba innings tenzükba sülen captain Ben Stokes-i ball 24 nung half-century yanglua team nem teyari tulu agütsü. Pa iba asaya nung opener ama asaya aser pai England nung asayrtem rongnungi Test asaya nung half-century takaratiba yanglua liasü.

Opener Zak Crawley fielding amenba mapang temeyong yiruba sülen left-hander Ben Duckett den Stokes opener ai aser pai tetenzük nungi ball kanga junga züka

asaya aser out mesüi run 57 yanglua liasü.

Pai run 57 yangluba mapang four teku aser six ana azük aser England team-i run ya over 7.2 nung dang menepa liasü.

West Indies team nungia Mikyle Louis-i kanga meranga nokdanga asaya aser Test asaya nung pa asoshi mezüngbuba half century yanglu aser kasa mapang nung Kavem Hodge-ia half century ka yanglu, ajisüaka Wood-i ball kanga junga anonba ajanga tanga batsmen temi junga masayatei parnoki run telong junga meyangluteti liasü.

## Pre-season Tour: AC Milan aser Arsenal nati takok angu

**Chiteni/July 28, 2024**  
**(Agencies):** Honibarnü New York nung AC Milan aser English Premier League champion Manchester City na asayaba mapang Lorenzo Colombo-i asaya mezüngbuba shilem nung goal ana idaktsüba aser Marco Nasti-ia goal ka idaktsüba sülen AC Milan-i asaya goal 3-2 agi kokogo.

Asaya nung Nasti-i minute 78buba nung Milan atema tasembuba goal idaktsüba sülen parnoki asaya koka liasü.

Europe nung club aika league season tasen metenzükba tsüngda tang US

nung pre-season asayaba mapang lir.

Yankee Stadium nung asaya nung Manchester City atema mezüngbuba goal Haland-i minute 19buba nung idaktsü, ajisüaka Colombo-i minute 30 aser 34buba nung AC Milan atema goal ana idakja asaya mezüngbuba shilem tembangba tashi nung Italy club ya goal 2-1 agi tejakdang liasü.

Asaya tanabuba shilem nung Manchester City atema Micah Hamilton-i minute 55buba nung goal ka idakja goal kasasa aküm, ajisüaka maneni AC Milan atema Nasti-i goal idakja


parnoki asaya akok.

Kasa mapang nung Los Angeles nung Manchester United aser Arsenal na asaya Arsenal-i goal 2-1 agi kokogo.

Asaya nung mezüngbuba goal ya Manchester United atema Rasmus Hojlund-i minute 10buba nung idakja liasü.

Ajisüaka mapang tatsüka dang lir minute 26buba nung Gabriel Jesus-i Arsenal atema goal ka idakja goal kasasa aküm. Telok anaprongla kanga toktepa asayaba sülen minute 81buba nung Gabriel Martinelli-i Arsenal atema goal tanabuba idakja parnoki asaya akok.

## Olympics: Manu Bhaker-i India atema mezüngbuba medal nguogo



**New Delhi, Chiteni/July 28**  
**(Agencies):** Deobarnü Paris Olympics nung tetsür 10m air pistol event nung Manu Bhaker-i bronze medal ngua India asoshi iba asayamung nung mezüngbuba medal nguogo.

Shooting asaya nung küm 12 lir tang mezüngbuba India nung asayar kati medal nguogo.

Arishi küm 22 tain asayar ya India nung tetsür shooter tem rongnungi Olympics nung mezüngbuba medal anguba asayar kümogo.

India nung asayartemi shooting nung tatamsa 2012 küm London nung Olympics asayaba mapang medal ngua liasü. Iba asayamung nung Vijay Kumar-i rapid-fire pistol event nung bronze medal angu aser Gagan Narang-ia 10m air rifle asaya nung bronze medal ngua liasü.

Olympics ana tashi nung shooting asaya nung medal ka dang mongui aruba sülen

Manu-i kanga meranga asaya point 221.7 nguteta bronze medal nguogo.

Iba asaya nung Korea tsür Kim Yeji-i point 241.3 ngua silver medal angu aser Korea tsüra Jin Ye Oh point 243.2 ngua Games record ka yanglu aser gold medal ngua liasü.

Kasa asayamung nung Arjun Babuta-i tebur 10m Air Rifle event nung final tongtetogo, saka India nung asayar Sandeep Singh bo final metongteti tsükatok.

Qualifying round nung Arjun-i point 630.1 ngua pa tenebuba nung tembang aser final atema qualify süogo.

Kasa asaya nung Sandeep Singh-i point 629.3 dang nguteta pa 12buba nung asaya tembanga liasü.

Arishi küm 25 tain Babuta-i, 105.7, 104.9, 105.5, 105.4, 104.0 aser 104.6 ta ngua ajak senteper point 630.1 angu aser pa qualify süogo. Final asaya Deobarnü asayatsü.

## KHRISTAN OSANG : Tapak 5 nungi...

### Uttar Pradesh nung Khristan apuani...

Rahul Kumar-i, "Pastor aser pa kinungtsü na apuba dak sendakba nung onoki police dang nungi osang kabo angutsü ta onoki anogo piyong imlaa ata-a liasü. Parnok chioktsü asü FIR benoktsüar onoki memeteti liasü," ta metetdaktü.

Uttar Pradesh Prohibition of Unlawful Conversion of Religion Act, 2021 ozüng kübok tena anema ken o ka benok.

June 21 nü Lower Court-i bail temepishiba magizükba

sülen maneni District Court of Azamgarh nung Sunita atema bail temepishiba agütsü. Iba ken oji July 8 nü angadangtsü telemtetba agia liasü saka July 11 tashi atsülang aser tesüsa July 12 nü la nem bail agütsü. Ajisüaka Sunita chioktsü atema inyakyim balala anogo trok tashi nung ang tembangba sülen July 18 nü la chiok.

July 19 nü Pastor Sanjay nem-a bail agütsüogo saka pa chioktsü atema ano mapang agütsü.

## BILEMDANGANG

"Nai mapa tulu minyaktetaka mapa tila bendanga agüja inyangang."